

嘉靖

皇華集

十四

皇華集卷之二十五編目

嘉靖十八年己亥頒冊立

皇太子恭上

皇天上

帝泰號二詔使三

帝昶開二國東三

帝昶十八年三月庚辰朔日 皇太子

年集卷之二十五終

皇華集卷之二十五

開城太平館次韻

華察

一望溝淩欲接天
城南城北滿人煙
三韓五部多遷徙
改惟有青山不記年

其二

延英長慶並嵯峨
宮殿參差燕雀多
部落已隨烽火盡
行人空指舊山河

其三

迎賓高館制猶新
門外香車碾玉塵
爭似八條終不泯
至今遺澤在東人

其四

井地曾聞畫九區至今阡陌已平蕪
憑君莫問興亡事百二秦關幾故都

其五

塵起黃橋野色昏歌鍾日暮正喧喧
杜鵑啼斷南溪月無數花枝血染痕

其六

雨過青郊草正青橐駝橋下小舟橫
漢江猶與長湍隔欲渡臨津幾問程

其七

開城山勢邈岩嶢萬疊東來送使輶吹笛峰頭腸欲斷夜深何處更聞簫

其八

吹笛橋邊風月清仙人一去不知名江城昨夜梅花落楊柳空含萬古情

其九

紺殿丹書景最佳道君遺跡半山崖當時何不崇儒教移向蘇湖治事齋

其十

香林花草競芳春吹入東風盡作塵莫向新亭多灑

淚眼中誰是百年人

次韻

蘇世讓

興亡無迹問蒼天
臺殿都隨一炬煙
舊物惟餘山獨在
冷雲飛翠認當年

攬雲鵠嶺碧峩峩
控帶重江氣象多
自是人謀無遠略
不關天險有山河

松岳巉巉霽色新
黃金大士已灰塵
千巖萬壑依然在
尚有尋真訪道人

斜陽匹馬過名區
惟見飛禽下綠蕪
白髮遺民空掩袂
風流猶自說松都

宮樹沉沉夜色昏滿城車馬絕囂喧銀箏一曲當時怨多少居人拭淚痕

聖居名山螺髻曉來青天際遙看一抹橫想得山靈應笑我煙嵐深鎖舊遊程

重重石逕勢嶢嶢問舊頻看駐傳輶敗瓦頽垣猶有恨月明何處更吹簫

夜窻孤坐不禁清十載塵中悔役名啜罷茶甌無夢寐溪聲月色揔關情

朴淵飛瀑見來佳誰把天瓢瀉斷崖擬洗十年塵土面翠微深處結茅齋

逝水浮雲五百春幾多名字播芳塵不須吊古增
惆悵此後寧無我輩人

刑曹判書金安國

興廢論人果屬天空間變滅幾雲煙可憐麗業終
衰日正值高皇撫運年

鵠峰龍岫對嵯峨嘿嘿如含恨慨多客枕不眠閒
繞幌曉簷西角掛橫河

南國河山帝命新舊京文物盡成塵年年只有
風光好畱與昇平歌舞人

甲第紛紛占勝區樓臺無處但青蕪名花盡入尋

常屋唯有垂楊管故都

滿月

名臺

松陰晝日昏風來長作海濤喧荒臺不復

尋遺跡廢井時看有水痕

山木蒼蒼野草青敗垣殘堞謾縱橫毬庭輦路深

宮地畱與行人取作程

迎賓舊館翠岩嶢尚駐東來

詔使輶夜靜清風

傳遠籟倚樓時和鳳凰簫

溫鞋陵廢井空清種稌田荒但記名舊迹不隨時

代滅停驂落日爲傷情

路向東城覺境佳泮宮依舊聳林崖

聖朝文教

東漸洽廢國絃歌亦滿齋

一統功垂五百春
孱孫無意嗣光塵
山川盡入新圖籍
遺訓空存鑑後人

述征十絕次大平館舊韻

薛廷寵

鴨綠江分南北天
箭門加豆密風煙
自從一統皇
明日玉帛梯航定萬年

其二

鐵山車輦嶺嵯峨
夾嶺青松漸漸多
景物總同非故
土同盧又度幾重河

其三

棹楔華旌雙柱新斷碑三尺莽沙塵郭山孝女門前路多少東來駐馬人

其四

大定清川通貝區洪波遠渚亂靡蕪百祥更上江樓望無數風光類漢都

其五

箕子廟前松木昏枝鴉瓦鵲競啾喧大同江水清如洗不洗當年血淚痕

其六

雲暗沙黃野草青棘城百戰苦縱橫只今瘞骨修清

館來徃行人記驛程

其七

翠屏蔥秀共峇峽廣幕高亭駐使輶百丈松崖懸欲絕凌虛何處聽吹簫

其八

開城山水迥佳清廢殿頽宮亦有名禾黍蓬蒿何限恨落花啼鳥最無情

其九

松嶽巍巍更鬱佳安和諸刹倚山崖摩尼不管興亡事休說當年曾供齋

其十

鑾輿東豫亦今春侍從無緣奉屬塵
金檢奏回天一笑今朝疑是夢中人

次韻

蘇世讓

鴨水粼粼際海天城當關塞接風煙
漸東化遠三邊靜藩屏皇家億萬年

孝娥高節照巍峩萬古清風特地多
更被天仙勤採訪驚看筆彩耀山河

納清亭上物華新地迥都無一點塵
汀草岸花歸領略到頭佳勝屬騷人

千年薩水擅名區遙憶隋唐迹已蕪
幻出新樓占勝境依然霞鷺似洪都

荒祠短碣雨昏昏一逕松楸百鳥喧
賴有八條遺教在萬家煙火太平痕

小溪清淺染苔青衮衮晴波畫舸橫
遇賞佳名傳簇錦詩仙曾此爲淹程

鳳山凝翠鬱嶠嶢幾度經過漢使輶
喜見朝陽昭世瑞來儀千載應虞簫

山風江雨十分清雲外天磨眼倍明
廢殿有基春薺老行人多少忝離情

故國溪山入望佳
松杉如畫絡雲崖
百年歧路空延竚
願借僧堂半日齋

新頒鳳詔物同春
一雨都收九陌塵
自是朝文教盛東方
還有衮衣人

金安國

江塹西分路接天
玉京琳闕霽祥煙
金泥封下龍鸞詔
震域歡迎祝聖年

東驚羣山漸鬱嵯
堠亭郵館列仍多
迢遙最是朝天路
悅駕仙槎泛上河

千年孝跡說如新
何限名埋骨作塵
天爲綱常畱

宇宙傳芳非獨一邦人

隋家往事笑區區江水空流野草蕪何似 聖朝

文教洽萬邦星列拱 皇都

傷痛殷宗覆暴昏東來猶爲化哇喧千年故國無
徵跡只有當時畫井痕

天陰多見野燐青馬首頻逢白骨橫誰爲羈魂作
寒食行人傷弔幾淹程

峰巒雙峙勢爭嶢奇勝連綿挽使輶山與高仙緣
自厚月明疑引舊笙簫

松岳山高水亦清中都形勝擅雄名龍孫十二終

何處問與山靈太不情
鬱蔥誰說氣曾佳
滿月荒臺只斷崖
五百年間猶可記
忠賢多出九公齋
鳳曆元開萬萬春
尚看滄海未揚塵
羣靈擁衛迎鸞輅
百福千祥奉一人

東坡館次雲岡韻

華察

驅車出開城投轄東坡館
人生七十稀吾年已過半
東藩况與江南隔何事飄蓬多浪跡
璽書玉節自天來
谿壑爲我生春色
今古人心誰感通
鴻山敢與眉山同時人
聞草鑾坡詔錯認當年蘇長公
我來江頭

歷州縣兒童走卒欣相見依倚若謂蜀道難安得川
中來海甸吁嗟乎人皆堯舜曾聞之東坡於我何相
疑

次韻

蘇世讓

解衣眼忽明東坡名小館平臨野三面斜倚山一
半東韓西蜀地相隔誰將華扁追逸跡兩仙才調
駕坡老從此江山還潤色古今雖殊氣味通金蓮
賜炬恩眷同燄光萬丈草木驚卓犖儷美文忠公
誰道他鄉各異縣大雅風人今又見 皇家文軌
混四海不間要荒與圻甸清塵日日幸從之不惜

解我平生疑

金安國

藩儀罄謹誠
迓詔飭賓館
揭額豈無因
佳號居一半
王京漸近
百里隔
况復江山多勝跡
後有寶山前赤壁
適與東坡值
物色理數契
合或感通地
同自令人又同錦袍手
擎綵鳳綸
羅胸星斗文章公
陋邦自視一裨縣
敢藉茲名爲贊見
珠璣散擲海外寶
不獨聲華震
禹甸吁嗟乎何幸於身親見之
摳衣願質胸中疑

東坡館次龍津省長韻

薛廷寵

學士當年氣作河流通異域亦東坡巍巍華揭懸山
館炯炯精靈照太阿菰米漂雲饒惠飯臨津鼓柁稱
湖歌從前跨鶴真來此多少詩章燦綺羅

次韻

蘇世讓

泯泯津流赴洛河

河在臨津下流

驛樓南望隔平坡村煙

半逗靡蕪渚瑤草叢生石壁阿

臨津兩岸有石壁亘數十里

明

月長鳴掠舟鶴洞簫時和扣舷歌淋漓醉筆爭題
破此地翻疑是博羅

金安國

波瀾筆下瀉天河海內文章數老坡英爽久知歸

碧落芳名猶喜寄林阿竇山疑有櫓鞋詠石壁如
聽桂棹歌丹荔黃蕉神倘下一方風景屬包羅

泛臨津江次雲岡韻

華察

水動浮青嶂沙明點白鷗樓臺臨絕巘簫鼓入中流
謾憶嚴陵釣虛疑范蠡舟微風牽錦纜語燕下檣頭

次韻

蘇世讓

暮色看歸鳥春聲聽泛鷗江山供勝賞星使好風
流柳渚寒芳芷苔磯繫釣舟何當理歸楫終歲伴
黃頭

金安國

澤沛波隨漲機忘復下鷗仰恩欽雅韻陪座愧凡
流花柳欣迎節魚龍穩送舟髦倪填兩岸瞻望美
黃頭

泛臨津江次雲岡宮諭韻

薛廷寵

江明照晴日沙暖眠雙鷗情共波光遠心驚歲序流
愛客徐牽纜開筵穩放舟爲憐途路意落日在亭頭

其二

江門風霧輕四月浪花清棹撥天疑破潮來岸欲平
東藩明日至孤劒一春征對酒憐遲暮猶堪簫鼓聲

其三

不識船爲屋今看纜掛楹正宜行載酒更可坐乘晴
日暖遊鱗動風輕細浪生漁舟來往泛滯慮洗孤清

次韻

蘇世讓

江影搖青雀漁歌起白鷗山川幾歲月詩酒又風
流萬里滄洲趣千秋赤壁舟歸心逐波浪已落五
湖頭

新試紫羅輕仙姿照水清日斜山影靜風細浪紋
平斲喜延佳賞還憐滯遠征倚蓬聊笑傲漁笛兩
三聲

障日張雲幕凌波載畫楹遊魚驚避棹浴鷺喜逢

晴酒力涼侵退詩懷景會生無因畱返照隨意亂
深清

金安國

彩鷁迎 丹詔蒼江舞白鷗物能欣 聖澤風亦
動清流勝賞傾霞醞高懷寄玉舟前程猶報遠候
吏擁津頭

凌波一舸輕棹進擘深清斜日浮汀白殘霞與水
平路遙觴自促春盡客猶征倘有閒漁父臨風爲
寄聲

小構臨江迥翻波影射楹閒雲收晚雨戲羽刷新

晴魚逐蘭橈躍潮迎玉節生輕風時泛席岸芷送
香清

立夏前一日碧蹄館作東坡體一律

每三字含
七字意

華察

館
令
隣
亭
宴
座

門
軒
貞
逕
眠
茵

尖
路
子
麋
蹄
邁

國點花春

高館斜廊左右隣
小亭翻愛座無人
空門倒掩開金鎖
曲逕輕眠細草茵
水接長天飛白鷺
山橫遠黛斷紅塵
碧蹄行邁滿王國
一點殘花半日春

次韻

蘇世讓

陰影
禽
飛
喚
水山
翳
皮
花
茵

簾芭夕蝶閣風坐

堠亭暮頭望春

綠陰濃影半無隣黃鳥翻飛喚去人水遠山高雲
變雨庭空花落草連茵重簾夢破迷蝴蝶小閣風
輕少土塵短堠長亭斜日暮白頭回望送三春

金安國

樓清月天冷多英

樹簾線自煙鳴縷

新箏塵首見桃

應春

層樓高與太清隣
月白天空冷逼人
倚砌紅英開
小樹穿簾碧線拂
文茵篆煙金鴨飛
雙縷鴈柱銀
箏絕點塵回首
五雲浮日下蟠桃
應綻襯長春
至漢城禮成志喜
用雲岡喜晴韻
薛廷寵

雞鳴脂車漢城去明星燦燦光天宇須臾海上駕初
瞰萬里無煙淨沙土山川草木盡生輝野叟村童爭
快覩宸章捧出雙龍函羽旗隊隊擁貔虎撞鍾伐鼓
四天聞足聲如雷又如雨 藩王咫尺瞻闕庭 帝
恩似海親濡煦從知聲教洽殊方禮樂制度超百王
玉書金檢得終賜千秋萬祀光宮墻自此傳播諸裔
荒 大明天子堯舜皇

次韻

蘇世讓

重明繼照進亨衢廣運如天覆德宇萬國歸心屬
一家率濱何地非王土餘輝先及日出邦遠人爭

快披雲觀謳歌大慶仰夏啓對揚鴻休拜周虎天
書五色金花 詔共沐 皇恩隨解雨康莊蹈舞
競驩呼四月天氣同和煦翩翩雙鳳下東方文蹴
歐韓筆鍾王自笑蒹葭倚美玉淺學難覩曹劉牆
謾將孤陋荷包荒曲中幽眇誰張皇

金安國

大明昇輝麗中天重明赫赫臨寰宇昭蘇萬物靡
不燭戴荷 恩光普率土格天奉廟殫誠敬舜孝
堯欽人共覩錫慶煥發前星輝拱極環躔炯龍虎
鳳綍隨春下九天沛澤汪汪若膏雨窮炎絕漠總

霑濡邈此韓區被先煦芝函玉檢照東方綸言穆
穆敷皇王擎來香案掌書仙下界聳觀紛擁墻
夜光按劒驚遐荒旋返颺輪朝玉皇

頒詔作東坡體一絕

每二字合七字意

華察

回生闕綸

噩衙賚親

國內無戈坐一人門開金闕下絲綸高麗不比長行
道大賚偏來遠見親

次韻

蘇世讓

時人鱗綸竿

幾鷗亲

紅日斜時綠映人錦鱗魚上細絲綸長竿裊裊磯
頭石鷗鳥高飛不見親

金安國

恩荷星綸邦罽

惓惓親

心仰 洪恩荷大人昭回星日布絲綸小邦偏被
無邊澤丹惓增添厚見親

頌 詔日志喜奉贈

華 察

賢藩奕世慶遭逢境接無勞九譯重玉帛萬年修禹
貢山川千里領堯封久知風教絃歌盛長沐 皇恩
雨露濃讀罷絲綸 天咫尺五雲翹首望飛龍

渡江抵碧蹄迎問相次不絕雖循舊章然皆出
特遣致詞懇款禮度周詳 賢藩精誠風誼已

在未傾蓋之先矣聊此記謝

薛廷寵

皇穹玉冊崇郊號青禁元良正震方東國喜承雙鳳
詔北辰遙仰五雲光候迎旌節俱遶簡紛列衣冠盡
激昂應是賢藩葵藿意歸時端爲誦朝堂

燕慶會樓

華察

承明敬奉黃金詔驅車策馬緣東道主人列燕在高
樓朱甍畫棟爭光耀閣道鬱崔嵬瓊筵就日開暈飛
雲共轉簾動斗初回綺疏繚繞花爭入洞戶參差鳥
並來還見風光通別殿鸞臺鳳沼紛如獻檻外羣峰
擁翠屏簷前流水拖晴練旣多景物成佳遊猶憐地

勝銷人憂東方秀色隣中土四月涼
隣近九秋司饗進饌展玉盤侍者行
觴泛弱蘭珊瑚樹裏畱芳景瑪瑙壺
中照合歡復道清歌揚激楚魚龍曼
衍興奇舞寶鴨香銷日暮時畱連絲
竹懸鍾鼓須臾秉明燭良宵歡未足
舞罷猶云闋柘枝歌殘猶有陽春曲
人生離合自無期山高河廣安可思
况復相逢在海外茲歡燕婉良足悲

燕慶會樓

書扇

名園高燕敞樓臺金鼓喧喧動地來
北嶽羣峰皆拱極南橋引水慣流杯
晴煙細竹當軒密麗日穠花繞

殿開萬里風雲多慶會鬱蔥佳氣接蓬萊

賦別

書扇

薛廷寵

銀燭金罍夜漏遲高情畱戀遇應奇西樓翫月當年
夢北嶽看雲異日思千里河山長屏翰累朝光寵
煥綸絲皇華歸報難重會惟待鴻音到鳳池

奉贈

王世子

華察

名王世子出銅梁燕爾來登白玉堂東道旌旗搖景
色西園車馬盛容光幾多雜佩齊蘭茝亦有脩文比
鳳凰此日歡娛同几席他時離別念衣裳

王世子英挺諸

王子多而且賢席上感而有

作

薛廷寵

靈鐘北嶽開千葉秀擅東方盛一時麟趾從知岐伯
化龜書定服禹疇遺儲圍毓粹真仙種蘭玉交輝並
俊姿環珮從容逢此日殊方應喜漢威儀

遊漢江次雲岡韻

華察

晴波千頃浸樓臺滌盡凡襟不染埃坐久已忘清晝
永興移還入小舟來鳥隨落日投林去花惜餘春待
客開袁紹風流今寂寞何人江上更傳杯

其二

博覽曾經涉九丘漢江風物近滄洲亭臺集葉雲中

起島嶼依微水上浮日暮艤舟臨野渡月明吹角滿
城樓涼颼却似清秋色回首翻疑赤壁遊

薛廷寵

涼幕高筵聚廣臺晴空萬里絕氛埃江風不動雲初
卷岸磧纔沉潮正來煙景恍疑天上坐野帆恰似畫
中開殊方勝會真難料潦倒須傾一百杯

其二

海門高浪湧丹丘草閣參差隱碧洲沙鳥背人時上
下靄煙入座自飛浮滄浪一曲漁歸浦落日千山人
倚樓疑是仙槎凌斗渚未誇赤壁作佳遊

次韻

議政府領議政尹殷輔

砌下澄江綠遶臺仙樓高聳軼風埃輕霑小雨青
螺淨孤擘晴煙白鳥來芳草連空春霽迥玉蟾騰
海晚雲開城南勝地仍佳節爛熳清遊莫放杯

文星耀彩照青丘玉節霓旌放十洲瓊韻揮毫光
燁燁天香滿袖暗浮浮桃花浪闊凌飛舸竹葉杯
深敞綺樓他日青綾西禁夢時時應落漢濱遊

右和

正使

江山天成百尺臺澄波凝綠鏡無埃茫茫極浦舟
南北渺渺長空鳥去來汀草有情吟外碧岸花隨

意望中開叨陪高會誠踰分乘興還須倒百杯

何煩跨鶴向蓬丘玉節陪臨杜若洲渡口日斜帆

影轉潮頭風緊浪花浮勝區已入高人詠天下從

知海外樓自弔井蛙迷大界從今無復忝仙遊

右和

副使

議政府左議政洪彥弼

閒倚金華步玉臺清都元自隔塵埃鸞回紫誥雙
旌出鳳下青丘五色來霈澤遠霑同解徧前星增
彩傍離闕飛車擬向三山外笑看東溟一酒杯
銀漢星槎艤震丘雲幢寶蓋集芳洲三春喜氣連

天遠萬里祥光襯日浮燭水虛襟還得月馭風高
興更登樓摩霄鵠舉那容挽祇許吾儕記昔遊

右和

正使

曠懷多喜上江臺萬里晴波洗塼埃工部杜規曾
襲服水曹何筆詎雲來百年賞遇高筵忝半日陪
遊下抱開指點五雲頻北望更催簫管盡餘杯

宿志平生蹈軻丘清流一派豈河洲身曾澡雪無
塵垢思入風騷遠俗浮超世想同跨海鶴高懷如
倚駕空樓窮陬政是榆枋鷄不見雲將汗漫遊

右和

副使

議政府右議政金克成

雲幢玉節共登臺碧岫澄江自辟埃野艇因風遙
復近渚禽何意去還來投壺舉白歡情洽擊鼓傳
花笑口開他日逢場修舊令幾回想仰倒深杯

華筵高敞耀林丘仙樂聲飄落遠洲鳳詔擎從

蓬島下錦袍香惹御爐浮明霞映日紅侵葦茂樹

叅雲翠入樓茲會百年難袞袞酒醒疑是夢中遊

右和
正使

天上神仙白玉臺人間風日謾塵埃多生幸托金
丹訣邂逅叨陪羽蓋來遠聽江聲雲外落平看帆

影鏡中開此時高興應難盡更酌流霞進一杯

海邦饒勝近蓬丘芳草臺前錦作洲雲際晴峰曾
共賞江中彩舫又同浮鴻飛迹在三千里筆落光
寒百尺樓觴詠不教絲管助儒仙多爲采真遊

右和

副使

蘇世讓

懷抱何須更上臺清流一掬蕩炎埃江聲遠到南
溟盡山勢多從北岳來渡口煙橫孤鳥過潮頭風
急片帆開畱連且作傳花飲羯鼓催時倒玉杯
一區形勝羽人丘潮退虛沙吐亂洲旌節遠從塵

外駐乾坤還向眼中浮
蘭舟穩泛坡翁棹
麗藻應畱杜子樓
他日仙曹九天上
海東奇絕詫茲遊

右和

正使

仙遊隨處好
亭臺胸次都無一點埃
黃鶴不將煙景去
白雲長共海潮來
何人玉笛臨風弄
幾處漁扉向水開
明日雪泥鴻印迹不妨頻覆掌中杯

名區元不隔丹丘
鸞馭飄飄下十洲
花謝桃源紅浪膩
日沉蓬島碧煙浮
移舟政好依蘭渚
待月還宜上畫樓
賴有此時兼地勝
衣冠佳會辦清遊

右和

副使

金安國

漏洩靈源出五臺寧將仙境屬氛埃要知雲構層
崖立爲待鸞驂上界來鳳管聲飛天外落金壘香
泛座中開隔塵凡骨緣應在叨侍真遊醉瀝杯
天仙臨處卽丹丘何用區區覓十洲霞醞薰交蘭
渚艷麟袍光射浪花浮玉京西隔天連海銀闕東
升桂映樓試擊空明歌一曲遙懷渺渺寄清遊

正使

下國娛賓獨漢臺江山纔足滌氛埃哇音聒耳徒
啁哖方譯傳言費往來但托尊壘情慙達唯憑酬

戶曹判書尹仁鏡

郭外澄江江上臺登臨陡覺隔氛埃遙山雲斂雨
初霽前浦波鳴潮又來明月似迎嘉客出輕帆須
趁晚風開佳辰佳境兼佳會乘興休停到手杯

天仙擎

詔下青丘雙節輝煌照漢洲歛灩波紋

羅縠細依微山色黛眉浮煙江到處俱清境雲樹
中間隱畫樓夜飲厭厭歸未可此生無計更陪遊

右和
正使

橫岡斗絕聳孤臺不受人間半點埃羅帶寬圍沙
岸去玉簪遙映酒樽來白鷗已信機心息青眼仍

教笑口開今日交歡須盡醉明朝恐把渭城杯
憑軒縱目俯川丘渺渺煙橫杜若洲山靄初收螺
黛出江風纔動浪花浮岸邊凝翠高低樹波底流
丹遠近樓天上仙槎經此後他年應記夢中遊

和右

副使

吏曹判書成世昌

丹崖高作百尋臺隔斷人寰迥脫埃水淨白鷗飛
不染樓空黃鶴去無來桃花暖漲春江濶錦纜徐
牽翠浪開勝地盛筵難再得敢辭微瀝盡餘杯
春江作酒疊糟丘醉裏閒吟鸚鵡洲水漾錦袍虹

影亂天教詩筆瑞花浮佳篇可擬三山句大手應
修五鳳樓何幸鯁生同勝會欲將圖畫記斯遊

和右

正使

無勞民力築成臺翠壁巉巉淨不埃暫倚雕欄窮
睇遠還將桂棹泝流來遐方幸辱同舟喜落屑欣
聞一笑開斜日半江紅欲斂掌中頻覆紫霞杯

仙山不獨是蓬丘漢水猶疑十二洲並首鷗眠毛
羽細齊謳棹激浪花浮碧連湖外迷春草紅遠林
端見畫樓竟日艤灘窮勝賞扣舷時復賦清遊

和右

副使

禮曹判書李龜齡

奇巖枕水矗成臺水色接藍不受埃佳境正連蓬
島趣清遊須待玉人來山雲閣雨濃還淡江日翻
波闔復開造物有情供勝景莫辭畱賞倒金杯

出郭崎嶇歷幾丘都收煙景付江洲潮添新雨沙
痕沒雲捲遙岑黛色浮好趁清風移桂棹促携明
月下朱樓名區正待高人顯茲會應同赤壁遊

正使

仙侶聯翩下玉臺遙程日夕厭風埃登憐高構雲
間聳泛愛澄流天際來洲島巧粧羅帶繞煙霞輕

抹翠眉閑剩將眼底無窮景爭奈樽前有限杯

人間自是有丹丘不必尋芳謝眺洲山帶晚雲螺

髻媚江含晴日縠紋浮蓬壺未隔三千界笙鶴如

聞十二樓觸眼煙花俱物外仙舟何幸忝同遊和右

副使

漢城府判尹鄭士龍

山擁層城水繞臺星輶戒路雨清埃麥波搖隴臨

江盡松籟乘風拂座來景觸詩鋒初放逸酒衝愁

陣已恢闕兩仙襟度寬千頃自愧坳堂守覆杯

緩引蘭舟並古丘梔牟風緊過長洲遊魚暗避宮

袍爛舞鳥欣迎桂棹浮筆下倒傾三峽浪空中洞
豁幾層樓曾隨勝侶窮探討今備趨塵得再遊

右和

正使

江風吹浪動高臺雲幕周遭障撲埃日脚掣蛇橫
浦去楊花袞雪入簾來仙蹤已發壺中秘勝集仍
教席上開屢假溫顏恢雅量更回清眄屬深杯
潮來不覺沒沙丘穩泛樓船下遠洲芳杜氣薰牽
纜送薄嵐光襯捲蓬浮高才已壓三王作健筆堪
修五鳳樓獲助江山詞轉壯茲遊無愧子長遊

右和

副使

承政院都承旨黃琦

占勝何年築作臺臨波負壁淨氛埃湖山不許塵
蹤過風月欣迎使節來景物本因高客重好懷要
待玉人開更陪仙會應無路月夕何妨盡一杯

煙護長江樹擁丘凌雲華構對芳洲窻虛不礙山
雲度席潤還知水氣浮方丈三韓曾有句仙人盡
日好居樓高篇萬丈騰光燄畱與東區記勝遊

正使

右和

蓬萊風襲鬱孤臺境絕都無半點埃林下花隨春
色去天邊鳥帶霽光來煙涵細柳金絲撚日漾長

江霧縠開莫負湖山清淨債徐牽錦纜且傳杯

鸞馭飄然卸石丘挈舟緩緩繞汀洲水光洗雨連

天遠山氣成霞障日浮名壓三王宜授簡才高五

鳳好修樓明朝曾散催脂轄回首城南是夢遊和

副使

楊花渡阻風

華察

楊花飛雪滿江頭斷送春光逐水流落日蒼煙橫渡
口桃源何處更尋舟

其二

江南只說船如屋東國分明屋作船此日中流多柱

石

謂在座諸君

不妨風浪勢滔天

次韻

尹殷輔

蘭橈西擊指龍頭誰遣衝風礙碧流應是天公要
挽駐不妨畱醉漢江舟
微茫古渡暮長煙撓亂楊花襯畫船爲報江神須
息浪高人從古有回天

洪彥弼

鳬舄雲巾照漢頭無端屏翳阻西流楊花水伯沙
爲窟羞見清光滿一舟

照人聯壁臨江水賤士同登李郭船樗散豈能扶

大厦仰看雲梓蔭青天

金克成

蹇駐雙旌坐上頭能令駭浪作安流
濟川他日爲徵兆陪從徒誇李郭舟

阻風多費黃頭力好句空吟下瀨船
却是楊花怯仙賞晚雲狼藉閔江天

蘇世讓

一江清景擅蠶頭歸興翩翩逐水流
不是風濤能作惡兩仙聲價厭孤舟

江神不借長風便十里灘頭閣畫船
古渡煙花空

在望洞簫吹斷月明天

金安國

遙青一點是龍頭泛泛楊花砌下流
望裏名區遊不得只緣風伯阻行舟

隱約螺峰露一頭楊花飛舞迓前流
漢神先設畱賓策故遣風師滯去舟

遐望已領登樓興剛被遊牽復上船
盡攬奇觀魔所忌休將風浪欲尤天

深機造物元畱客肯喜登樓旋上船
解事風師還喻意下流能遣若登天

柳 灌

漢船初擬駐蠶頭
桂棹蘭橈順碧流
正謂飛廉先戒路
錯教翻阻下灘舟

名勝楊花稱自昔
輕橈催擊下江船
顛風拍岸還非惡
歸路長郊月滿天

尹仁鏡

纔登高構又江頭
遊舸將窮上下流
但使歸程乘好月
任教風浪閣行舟

江山有意挽詩仙
步步牽風故滯船
不覺火輪沉碧海
更看孤月上青天

成世昌

江風乘晚打船頭就泊沙灘不下流
夜擁火城還入郭渡邊空歎有虛舟

陰陰垂柳隱河邊百丈牽江引畫船
莫訝驚波阻歸路魚龍掀舞奏勻天

李龜齡

斜陽欲隱海雲頭風送驚波水逆流
寄語江神休作惡海東難見此仙舟

晴川芳草崔郎句桂棹蘭橈赤壁船
酬賞未闌暉已隱任他風浪拍昏天

鄭士龍

擬浮文鵲泊龍頭斷渡風來勢倒流意足不須窮
勝踐邦人爭望李膺舟

高文上訟今能事風伯寧遮下瀨船只是罷遊應
宿債從來行止揔關天

黃琦

泛泛長江不盡頭無邊清興逐西流天風戲劇還
多事咫尺楊花閣晚舟
沿洄擬遍湖山景逆纜還如上瀨舟幸賴風翻銀
浪湧不妨高興薄青天

遊楊花渡不至

薛廷寵

漢江樓下理遊船，興入前川思渺然。
畫舫幔亭隨取次，清尊激矢愜留連。
波翻碧落長風外，路隔楊花古渡邊。
人事天機難自料，從來勝會少曾全。

次韻

尹殷輔

江亭撤席上樓船，遙指楊花興杳然。
謾把杯觴酬勸緩，閒投壺矢笑諧連。
清陰不覺隨山轉，落景都忘迫海邊。
遇賞湖山應有數，由來好事鮮雙全。

洪彥弼

西風吹急下江船，不進還如鈍馬然。
舉棹頻看黃

帽偃倚舷愁見白波連蠶頭孤峭歸雲外金瀨狂
瀾夕照邊盡日遙看渾不賞人間樂事自難全

金克成

下樓催泛木蘭船入望龍頭意颯然西日欲沉東
月上江波初漲海潮連無端橫被顛風妬不奈愁
吟淺水邊坎止流行惟所遇人間萬事豈曾全

蘇世讓

風飄仙袂上樓船江霧霏霏正靄然落日波濤紅
乍映亂峰前後碧相連數聲欸乃晴沙外一抹炊
煙遠樹邊不見楊花浮白雪百年心賞恨非全

金安國

樓筵晚罷促登船萬頃滄波興渺然日媚楊花方
隱映風翻桃浪忽牽連無端月出東山上不奈心
懸北極邊要把流霞酬宿債人間好事本難全

柳 灌

歌管交催擁畫船憑虛豪興覺飄然忘機鷗鳥浮
還沒入望煙雲斷復連勝地有期隨在處風濤無
意阻歡邊天仙慣領蓬壺景此會寧嫌欠兩全

尹仁鏡

擬向楊花放畫船眼窮蠶嶺爲欣然長風忽作掀

天起逆浪渾疑急峽連玉笛罷吹明月下綵帆空
倚暮雲邊本因清勝淹旌節人事終難出萬全

成世昌

擬泛楊花渡口船晚遭風浪意茫然仙槎忽阻銀
潢遠望眼空穿玉嶂連舟楫盡依垂柳外人家多
住夕陽邊歸來却恨飛廉祟未盡名都氣象全

李龜齡

高人對詠倚樓船芳草晴川興浩然日暮波頭山
影轉風回雲際笛聲連狂飈忽起青蘋末柔櫓催
鳴白鳥邊玉節清江相映照莫言餘事有虧全

鄭士龍

狂風無奈阻行船遙望楊花意惘然巨纜挽時疑
簸斷輕篙進處却鈎連煙光晚合平蕪際樹色晴
迷遠岸邊不比山陰空興盡隨緣輟棹亦天全

黃琦

妍日清江照畫船輕風送棹思悠然沙頭鷗鷺閒
依倚天外峰巒遠接連逸興如登三島上歸心還
望五雲邊泝流莫怪楊花阻勝事元來不兩全

謁宣聖廟示諸生

華察

一望宮牆數仞餘辨香瞻拜意踟躇春風有待魚龍

化時雨無心草木舒聞樂自忘三月味乘桴誰共九
夷居箕疇更衍斯文在吾道東來信不虛

薛廷寵

天下車書正一家海隅聲教舊通華春風化雨壇花
潤翠栢蒼梧泮水遮吾道宮墻高日月殊方士類倚
蓬麻諏咨寡術真堪愧獨賴皇風遍邇遐

次韻

蘇世讓

刪定羣言力有餘天衢高廣孰躊躇道爲埏埴容
狂簡心在行藏與卷舒千聖向來非係地八荒何
處不宜居分明廟貌存神處庭檜陰濃講榻虛

和

正使

洋洋絃誦自 皇家大道從來不隔華壇杏春殘
紅雨過庭松日午綠陰遮丁寧聖訓潛開牖錯落
宮袍遠映麻星使年年瞻拜地吾東誰道在荒遐

右和
副使

金安國

諮俗宣恩未暇餘禮伸文廟爲躊躇觀瞻共範容
儀盛講問能令道脉舒教廓自能如日揭化興何
必在身居 皇風最覺東漸洽萬世師模敢道虛

右和
正使

四海同文共一家萬邦星拱仰重華鳳綸宣布恩
滂沛麟服瞻觀衆擁遮禮聖光儀人似玉談經疑
難士如麻流聲縱未希鄒魯樂育皇風荷永遐

右和
副使

柳 灌

半壁漣漪化雨餘麟袍雙映此躊躇杏壇日暖紅
初謝檜樹風和綠政舒萬古彝倫宗聖德千年靈
宇儼神居握衣未敢希堂室柯則唯知語不虛

正使

東服雖偏屬一家菁莪樂育仰中華徒聞儀禮三

千節未厠橋門億萬遮星使瞻臨光道學 皇風

宣播及蓬麻廟宮肅穆神如在須記尊崇達四遐

右和
副使

尹仁鏡

過化曾經闡範餘聖言仍想意躊躇皇華倘恕儀

文陋溫色祈將道義舒璧水漣漪源正脉泮林瀟

灑蔭齋居須知縫掖藏修地不數區區賦子虛

右和

正使

皇化同仁四海家藩邦聲教範中華旌輶謁廟欽

儀度簪履觀光競擁遮多士自應歌魯泮明時無

復詠丘麻叨承函丈提撕益法語欽聞道不遐

右和

副使

李龜齡

陋學安能得緒餘泮林投跡謾踟躇須知遐裔文
風暢正賴朝家道脉舒遺教尚傳箕子範空言猶
記聖人居皇華倘採尊師俗莫謂狂生語誕虛

右和

正使

宗師重道自皇家瞻拜靈宮景使華壇杏經春
紅雨隕泮林迎夏綠陰遮陪隨講喜新函丈揖讓
儀非舊固麻拄下秉彤張盛化倘書文教洽荒遐

右和
副使

工曹判書尹世豪

洙泗源長接緒餘儒仙今又此躊躇
芹霑化雨香初散檜舞化風葉政舒
樽俎兩楹嚴祀典冠裳百代奠民居
皇家文教東漸遠士誦詩書不尚虛

右和
正使

翰苑方推兩大家芹宮駐節便生華
五車便腹能淹貫八斗高才不礙遮
在泮賓儀歌采藻還朝祥兆閣生麻
聖門寧忝肩游夏但荷皇風振邇遐

右和

副使

承政院左承旨申 瑛

經幄從容補衮餘箕封文獻眷躊躇心傳聖學淵
源遠口播皇家惠澤舒道德無窮存廟享歲修有
所見齋居民彝物則同遐邇風土殊方語恐虛

正使

聖遠言湮驚衆家却遺敦實尚浮華縱經濂洛淵
源正尚被隋唐利祿遮大道揭天昭日月斯文行
世若絲麻箕封最服漸東化爲報皇華不我遐

副使

皇華集卷之二十五

皇華集卷之二十六編目

嘉靖十八年己亥頒冊立 皇太子恭上 皇天上

帝泰號二詔使四

皇華集

皇華集

皇華集卷二十六

太平樓次韻

華察

飛棟耀丹青重簷巢翡翠金谷尚藏春玉樓人未醉

其二

好風自南來夕陽忽西下銀燭照金尊清光長不夜

其三

遠道三春去高樓一醉歸落花隨馬足片片點羅衣

其四

明月在南樓祥光映東壁細數題詩人俱是天涯客

其五

拱極山俱北憑闌月已西壯心飛欲動中夜忽聞雞

其六

人從花下歸鳥向花間宿無限惜花心夜深還秉燭

次韻

蘇世讓

花落散餘紅松陰含晚翠尊中酒不空欲謀良夜
醉

皓月可中庭泠泠風露下魂清耿不眠玉漏催三
夜

東人歌九罍無使我公歸難能投井轄空自詠緇
衣

捧心效西施分光借東璧離恨在明朝悵望瑤臺客

望眼山連北歸心月向西羈懷與別恨愁殺五更雞

桑下亦有戀於予且信宿莫怪勸酒頻聚散劇風燭

金安國

高樓倚朱欄南山呈晚翠不是惜爲歡無心開酒醉

清晨不上樓步立薔薇下無復尋春紅顛風恨前

夜

夜夜青天月他鄉客未歸清尊頻喚醉酒點染征衣

夜漏報深更銀缸耿半壁明朝度西關遠別天上客

候鴈方歸北神京正在西離懷難得寫把酒聽荒雞

清鐘欲罷宵棲鳥時驚宿獨起鳴橫琴燒盡床邊燭

太平樓歌

薛廷寵

大平館大平樓壯冠東方十八州瑤軒綺構何清幽
俯瞰漢城道芳菲雜花草平臨拱極嶺崔嵬峙千仞
高臺四望真鬱蔥朱甍甲第連王宮雲窗霧宇森
虧蔽壁房錦殿相玲瓏蓬萊海上來鵙鵲空中起禽
鳥百韻遞笙簧赤林朝曦映羅綺大平樓大平館曲
榭層楹忽中斷高堂廣厦復橫貫文茵錦簟盈地鋪
羽葆青幢粲紛亂黃門使者白澤袍東來氣與樓爭
高停驂弭節登樓望眼明千里如秋毫珊瑚鈎玳瑁
梁日月跳珠光蒼茫恍惚河漢天一方下樓行廻廊
翔金甕銀燭白玉堂從容環珮鳴鏘鏘椒蘭香瑪瑙

涼紫庭多麗三千履歌喉舞袖侑清觴歌大平舞大
平大平 天子鴻業興綸音赫赫東方迎邸第樓臺
多氣色山川草木盡光榮君不見 藩王擁仗迎詔
天日晴須臾雷雨如盆傾大平樓上大平曲五雲回
首思神京

次韻

蘇世讓

登高館登高樓漢城佳麗是 王州霧閣雲窗清
且幽平平俯周道處處生瑤草前峰與後嶺琬琰
上千仞生祥降瑞氣蔥蔥五雲常繞蓬萊宮風流
文物自 皇朝滿街玉珂搖玲瓏城中百萬家甲

第連薨起喧闐鼓吹窮朝晡珠簾高捲飄羅綺登
高樓登高館朱欄縹緲清塵斷回廊列楹同珠貫
銀屏繡戶次第開簾外落花飛撩亂天上真仙宮
錦袍從來未厭樓居高夢裏華胥千氣象覺時分
明揮彩毫小秦晉隘齊梁旗亭煙火何茫茫雞鳴
狗吠達四方和氣游祥風翔 大明天子開明堂
千官玉珮聲鏘鏘調雨暘燮炎涼東海無波今百
年感戴 皇恩稱壽觴賀昇平頌昇平日月光華
星文粲綸音到處爭懽迎醺酣更唱大平曲枯草
同霑雨露榮君不見干戈昔日風雨未肯晴洪濤

殷地天柱傾願歌此曲俾勿壞萬歲千秋拱玉京
大平館在漢城爲詔使駐節之所館之命名
盖取四海一家大平全盛之意芳洲張公有詩
六十韻予因和之

華察

丹書玉笥下蒼穹萬國陽和此日通天意遠隨人布
德臣心真共水朝宗清時地廣河山壯景象光浮日
月重物色求賢皆麴蘖鷹揚卜將盡羆熊皇圖已覩
齊天久國本俄傳出世雄長子命名由震索多男應
祝自華封謀深典則思貽燕化普文明識見龍王鬯
喜聞雷出地禎符先見渚流虹升儲始正千秋號定

策無勞四皓功雙鳳並辭仙仗侶五更初動禁城鐘
祥開璇極青天上曉映星河太液中共侈賜衣沾寵
渥謾勞祖餞走臣工鶯啼上苑春聲軟眼醉長途花
氣冲水濶天高行正邁山廻路轉意無窮征夫指點
威儀盛候館將迎禮數隆絕徼觀風思德化遐陬聞
旨起衰癯壺漿走迓千村合甲士驅馳四牡衝消息
先傳天遠近歡呼不計歲豐凶寧辭塞上風塵苦須
信天涯禮樂同鴨水迢遙成巨浸蠶頭起伏見諸峰
井田制古存遺化孝女門高爲動容野色遠迷芳草
綠落英猶帶杜鵑紅行看北嶽林巒聳坐却東厨供

帳豐自許孤忠標俗態敢將身世托萍蹤三春已過
催花雨四月初經舶棹風寄譯每欣通會語方言未
解且佯聾朝暾起見玻千頃夜月斜懸城一葺問俗
自嗤全覆鹿省耕兼恤半飛蓬興來尋勝時穿窟力
倦登高欲倚筇笑指山靈窮虎穴謾邀海若訊龍宮
花香百和驂相度巖歷千層鼓吹從恍惚滄洲隔人
世分明圖矯是崆峒苔生淺逕還深逕麥秀新叢及
舊叢徐福好游真汗漫王喬未遇爲疎慵光騰劒戟
明星漢影動旌旗結繡絨竹引清飈搖翠戶鳥驚飛
絮躍瑯櫓朱甍鬱律樓臺迥畫棟參差殿閣崇抹野

風光開曉望滿城和氣動春融綺筵燈火偏宜夜翠
嶺松筠不識冬犬吠雲屏逢白叟笛橫煙壠見黃童
衣冠濟濟文風盛俊乂彬彬淑秀鍾磬折每來門下
吏口碑猶有道邊傭緋袍仗節迎天使缺騎鳴銚集
土戎巧藝自能成楮帛阜財不用鑄蚨銅殊方亦有
詩書府樂土咸誇衣食充夷夏異區元一統干戈並
戢事三農流光轉眼驚巢燕故國關心問去鴻章甫
漢庭人磊犖城隍海服氣溟濛風聲咸暨高皇代
職貢時修天壤東心賞霞標相掩映身經雲窟出龍
從關山每衛孤臣勅桐馬難澆萬古胸鞭叱風霆神

列子徘徊煙水弔任公紀言自恃彤金管借景疇分
赤白洪歸路忽看春寂寞客窗時對月朦朧謾憑白
玉堂前夢寫入烏皮几上桐萬化本來成物幻一心
應不愧穹窿情懸魏闕身猶遠歌到皇華興轉濃燕
罷客心驚落日詩成詞意薄晴空僕夫候道驪駒健
軒服臨門鑣串鬆記取 國王當別語大平 天子
樂時雍

大平館舊有六十韻歸途追次之 薛廷寵

鬱蔥佳氣浮蒼穹東國山川此日通北嶺挿空嵬拱
極漢江入海浩朝宗天開絕險籠諸道地闢鴻圖擁

幾重烽淨邊城無斥堠雲屯甲士總飛熊卽欺蜀境
三分隘謾說秦關百二雄 聖祖金符藏太室朝鮮
鐵券領提封九經頒賜親摛鳳重譯稱臣久覲龍累
代恩深覃雨露五雲光動照霓虹乾坤載荷生成德
屏翰恒思保障功職貢匪云脩玉帛忠貞定欲勒彝
鐘衣冠禮樂諸藩並文軌車書一統中邸第碁聯迎
使節簷楹翬拱妙材工浮江齊起魚龍躍聳漢曾防
鷹隼冲形勝寧知葢海角梯航正合遡天窮省方不
異南州美問俗猶存太古隆雞犬閭閻誇富庶菰蒲
粟米免疲癯守臣仗鉞嚴觀察虎將提兵銳折衝牛

隴春深勤播種鯨波海晏斷妖凶高麗故蹟存松嶽

箕子遺祠儼大同

江名

東望王京環四塞翹瞻龍首冠

羣峰規模壯偉推都會景象鮮穠挹野容遠近林塘
芳草綠參差臺館夕陽紅危樓便是移滕閣遐矚分
明徹部豐城上垣墉連雉堞市中車馬密人蹤苔痕
沿砌初經雨花氣薰人乍送風壁殿錦房相掩映霧
宮雲戶半朦朧朱旂繞室森陳衛紋席鋪庭軟覆茸
極浦微微看遠樹長江渺渺見孤蓬田家饁婦持筐
宮村郭園翁曳竹筇不用浪尋三島地恍疑身入九
霄宮紫霞衿佩雙娥下白露衣裳獨鶴從舞袖側觀

歌振鷺笙吹忽聽奏崆峒鶯穿暗柳調簧舌燕蹴飛
花墜綺叢名館暢然憑眺覽漫游好矣任疎慵欲延
不夜多張炬爲怯餘寒更着絨移坐就雲開檻闌鉤
簾對月敞窻櫳豈無作賦追王粲謾擬貪歡慕石崇
金酒杯濃琥珀薄冰漿碗碧葡萄融輕薰爽透全宜
夏陰洞涼生却訝冬綦履踰趨皆候吏錦囊隨侍有
奚童星河搖落吟千首湖海從容飲百鍾宇宙浮生
俱逆旅古今勞役總夫傭幸逢三殿方傳詔况值
諸藩盡息戎八座遲回畱燕幕五更恍惚聽壺銅從
來蹤跡矜奇絕此日襟懷喜飽充可笑紆朱防繫縛

何當解組侶畊農機忘溪畔雙沙鳥興逐天涯一塞
鴻真樂會須超造化玄心直欲靜鴻濛時光冉冉如
過隙流水滔滔自逝東薊北迴瞻雲杳邈閩南夢落
嶺寵從端居節序偏縈感異域羈棲倍愴胸落莫他
年思勝事行藏此去信天公承明簪筆慚疎陋青鎖
叨恩仰渥洪啓處靡遑徒跋涉諏咨無策類癡聾知
心幸托囊中劒博物還迷爨下桐終屬依光噓爝火
敢期煉石補穹窿 鑿輿東豫情殊耿駟轡西旋意
正濃漆吏曉蝴元是幻鄭人蕉鹿恐成空滄波蕩漾
牽歸纜騶馬行嘶振亂鬆金檢馳回天上奏東方文

物正熙雍

次韻

蘇世讓

皇仁無外覆玄穹四海爲家道路通
星拱北辰咸仰嚮水流東海摠朝宗
王家緒業基千世帝里山河壯萬重
嘉祝百年均普率休祥一夜夢羆熊
爭傳漢帝龍顏偉共道唐宗日角雄
璇極前星看再耀春宮寶冊定新封
十行鳳詔頒區宇百辟鵷班賀袞龍
一視遐荒恩似海聯鑣仙侶氣如虹
皇猷正賴鋪張手至理應須黼黻功
直把聲名驚鰈域擬將勲業勒彝鐘
乾坤盡入牢籠裏宇宙都輸俯

仰中文軌馬揚同騁怪詩追曹謝與爭工雄鱗滄
海鯤俱化逸翮層霄鶴共冲持節遠來遼塞迥擡
頭遙望海天窮暫辭講席客諏遍穩着宮袍寵錫
隆爲與陽和宣德澤好將汪霈惠疲癯風儀脫略
心無累樽俎從容氣折衝筆下曾經嚴衮鉞胸中
秦鏡照邪凶觀風關塞音雖異攬轡郊原景自同
地隔幽燕橫巨壑山連靺鞨簇羣峰千年形勝供
新賞萬里風光帶媚容垂柳政搖官道綠小桃初
謝驛樓紅香生瓜甲溪毛軟釘疊盤盂海錯豐物
色尚餘前輩句風流可繼古人蹤娟娟長對當樽

月習習時携蒲袖風灑落名區真刮眼鏗錡仙樂
可開聾天涯節序鶯將老原上王孫草又茸雲物
尋常連渤碣樓臺咫尺近瀛蓬閒揮談麈憑危閣
高聳吟肩倚短筇行邁已窮箕子國夢魂長繞未
央宮塵埃擬蛻人間去笙鶴將追物外從白眼幾
回看世俗青蛇直欲倚崆峒眠燒金鴨芙蓉炷醉
擁瓊樓錦繡叢四牡歌成賓席敞三春花落旅懷
慵華山曉日騰佳氣紫陌晴雲纈綵絨笳鼓喧闐
連碧落簾旌隱約映朱櫳龍盤虎踞金湯固鳳翥
鸞翔觀闕崇自是皇家恩浩蕩直教東服化怡

融人勤稼穡知饒食家有桑麻可御冬民禁佩牛
聞漢吏衢謠順則聽堯童絃歌自足追三代節義
能教芥萬鍾三國流風存故老八條遺訓及胥傭
東溟妥帖無鯨浪西塞清寧絕犬戎貢實旅庭多
白苧貨通商賈少青銅皇華問俗身能健勝境探
奇意自充來路煙花添物色歸程畦壠接耕農鄉
心已逐西流水雲翮難回北去鴻行旆拂煙風獵
獵征衫帶濕雨濛濛還搖玉珮歸天上祗擲明珠
散海東鴨綠江深波歛灩天磨山在義州峻石寵從
離懷對景頻添緒老淚臨風欲灑胸孤陋自嗟居

涸井追陪何幸近明公長垂白髮悲潘岳未就丹
砂媿葛洪細故驅人空汨沒昏花着眼更朦朧方
歎一顧槽間馬蔡子還收爨下桐淡月襟懷憑譯
語明宵星漢仰穹窿華筵唱疊驪駒怨玉笋傾添
竹葉濃鶴野風沙朝接海薊門煙樹暮連空催行
易覺光陰逝靡盬難禁鬢髮鬆歸佐太平閑壽域
還邦應更樂熙雍

右和
正使

皇家眷命應玄穹一統車書萬里通黷武勤兵卑
漢帝崇文敦化軼唐宗百年禮樂三光靜四海梯
航九譯重濟濟虞韶儀彩鳳恢恢周獵得真熊京

分南北邦基壯山控東西地勢雄玉帛筐篚歸禹
貢關河版籍入堯封仁蘇枯枿施甘露德照昏衢
駕燭龍麟趾休祥孚繞電燕謀嘉瑞協流虹盤根
仙李新綿祚奕葉猗蘭更樹功慶衍誕彌閱甲觀
歌登重潤勒洪鐘欣逢解救雷初作正值離明日
再中震噐有歸崇典冊渙音方播舞臣工生成化
與陽和暢曠蕩恩兼淑氣冲萬彙涵濡忻有象羣
生蹈忭樂無窮星輶暫駐儀容肅鳳綍新頒惠渥
隆漠北擡頭看細札山東扶杖起羸癯爭聞鼉鼓
傳三夜共喜狼烽熄四衝和氣蒸熏呈瑞應妖氛

消散絕災凶剩將宇宙歸昭泰更荷雲龍屬會同
彩靄蔥朧籠萬戶祥煙斐亶繞千峰風搖路柳添
妍態露浥階蓂逞麗容造化無私均發育物生隨
分自青紅耕桑樂業知民阜藁秸堆場驗歲豐佳
節清和饒樂事勝區方丈有仙蹤蒨蔥禾稼村村
雨隱約簾幃院院風綠樹曉鶯晴睨睨碧窓朝霧
晚朦朧殘霞襯岫舒頰絮細草鋪郊簇綠茸佳處
正宜閑几席壯心元自在桑蓬時輸景物供揮翰
好把乾坤入倚筇身遠寅賓賜谷日夢勞趨走紫
宸宮尋山凌頂期幽討問水窮源任邇從清想堪

同食沆瀣奇遊不必訪崆峒初看客院新松蓋應
長家山舊桂叢高閣望時詩思湧短簷幽處鳥聲
慵凝香燕寢圍霞帔織翠華裾纈霧絨琥珀酒光
浮醖琤琅玕竹影映房櫳涼生枕簟園林僻暖透
觚稜殿宇崇異卉奇花香泛泛清歌急管樂融融
黃梅欲熟初經雨翠檜長寒久傲冬晴旭弄輝翻
大旆綵棚呈戲走羣童聯翩俊乂才堪用磅礴山
河秀所鍾鵠立階墀諸扈從駿奔邊豆幾夫傭須
知薄海霑聲教自是推恩遍夏戎喜觀雅儀森玉
樹驚聞妙語選青銅承 綸眷向鴻儒重專對才

宜遠使充季札從知能採樂樊遲堪笑學爲農閒
情有似翩翩鶴高意真如的的鴻南徙已看風在
下東征誰嘆雨其濛馳心鳴劒伊吾北得意揚鑣
瀚海東準擬乘槎超汗漫那嫌叱馭度龍從蓬壺
不隔三千界雲夢曾吞八九胸勲業定追周十亂
風流應倒晉諸公陽春有脚情懷暖滄海無津宇
量洪潛化芝蘭通氣臭每承談誨啓昏聾叨逢伯
樂慚駑馬幸遇中郎擬爨桐管豹未能窺炳蔚井
天那得識穹窿交情儘許金心斷歸思休催粥面
濃還媿才窮詩律短翻憂日落酒杯空吟時祇益

丹心苦醉裏都忘白髮鬆惆悵江頭分首後風儀

何處接雍雍

右利副使

慕華館燕別

殿下次雲岡韻

華 察

離亭別曲奏皇華舞袖翩翩映彩霞南陌幾人曾折柳西園何事又飛花歡娛未竟春先去光景無多日易斜兩地相思勞夢寐漢江回首隔天涯

慕華館紀別

薛廷寵

東藩五日皇華客漢水千年離別情祖道拭看車萬騎陽關疊唱曲三聲楊花莫傍愁邊落笙管何心忙裏聽後會應憐無覓處出門牽手酒頻傾

次韻

蘇世讓

極知死別輕生別方信無情勝有情楊柳靜搖愁
裏線驪駒頻送酒邊聲溫溫和氣無多接袞袞清
談幾度聽春樹暮雲從此遠白頭長憶蓋初傾

西歸發碧蹄微雨復晴次史鹿峰韻

薛廷寵

青山送雨潤車來故故輕陰半若閑雅趁微涼清道
路卽從別館盡餘杯山川識面還增秀京國關情遂
早回却憶漢城分轡昨今生無處更尊罍

次韻

蘇世讓

小軒簾幕待歸來應爲看山一半開
蓮箭漏殘更五點渭城歌罷酒三杯
雲浮霄漢心俱遠路隔蓬瀛夢易回
後夜月明還悵望不堪亭館對空壘

石將軍歌

薛廷寵

漢城西來碧蹄館二十里外青峰斷
峰頭雙石號將軍臺笠琢面眉目判
身長二丈崑且豐天然異相臨道畔
問渠來何年鴻濛初闢前九畝防風未
出世十圍無霸尤相懸曾見長狄兄弟
殞叔孫烏江蓋世悲英魂奈何七雄三
國六代五季爭紛紛其間戰鬪奚啻千
百合功成一將民如焚漢唐御戎並失策
宋力

不競屈夷狄勝負成敗如奕棋將軍貪功無時息將
軍貪功何足言天地震蕩河水赤惟有射石飛將軍
百戰匈奴無虛鏑終身老死不封侯仰視衛霍堪嘆
惜五千出塞將軍孫一敗塗地還降敵降敵滅名大
可羞功高禍奇身亦憂韓彭趙醢那更說武穆噉冤
英雄愁嗟哉山頭石將軍神力不動功無聞天長地
久爲終始屹然千城鎖北門雖然賀蘭山下寇突厥
天子徵兵賜節鉞將軍飽殄煙霞弄雲月一矢不發
誰報國君不見五侯登壇擁金印鐵衣雪色拂霜刃
夜半傳呼銅鞮來堅壁不出何異頑石空千仞

次韻

蘇世讓

西行路向東坡館峻嶽苗萃林麓斷崑然奇峭石
將軍創自玄黃初剖判當時天匠揮月斧屹峙百
丈層崖畔茫茫不記年默默依山前冠劒戔戔鎮
東陞歲久尚帶藤蘿懸區區據蜀笑公孫不戰自
懾天驕魂頑骨不隨磨洗變山風野雨徒紛紛千
霜百霆曾不動一髮偃蹇不怕崑岡焚吾聞呂秦
本無策虛築長城防胡狄亦有漢皇恣窮黷飛芻
輓粟民不息兵交原野積屍滿腥染河潼流血赤
沙場暴露萬骨枯恐使無辜罹鋒鏑驕將貪功竟

貼危未免薶醢真可惜豈如將軍逃名在海邦凜
凜風稜無與敵緘口何曾有起羞世晏不見干戈
憂炯炯元精貫斗牛神光夜發魑魅愁壯氣直壓
百萬軍鶴唳風聲那得聞山靈扶擁鬼訶護萬古
鎖鑰雄西門永絕侵戎獫狁與突厥始知不怒威
鈇鉞終教鍊成五色可補天不復憂崩有杞國天
仙醉墨妙傳文章印摹寫奇狀恢餘刃題詩擲地
振金聲胸蟠泰華高千仞

重渡臨津江用吳龍津漢江韻

薛廷寵

小雨清和候輕陰午正開江明依浦樹天入釣魚臺

彩鷁添成畫
洪濤忽訝雷
沙頭雙白鳥
爲認客重來

次韻

蘇世讓

密雨朝猶暗
重雲晚忽開
聯船宜架屋
疊石偶成臺
江淨風拖練
灘喧夜轉雷
沙鷗如愛客
飛去又飛來

弔高麗故宮次雲岡韻

華察

藤蘿古木晝陰陰
層閣迴廊土半侵
問訊當年歌舞地
荒臺寂寞野花深

其二

當年臺殿四時春
此日空飛簷幕塵
試向斜陽尋舊

跡慣遊麋鹿不驚人

其三

東風倚杖一登臺寂寂松花點翠苔
華表尚畱明月影鶴鳴何處不歸來

薛廷寵

草迷崩砌莽成陰苔長殘碑歲月侵
當日誰能馳馬至九關魚鑰正深深

其二

當年臺榭醉長春九陌香車軟綠塵
回首可憐歌舞盡落花啼鳥揔愁人

其三

停驂直上最高臺
逕轉山深破綠苔
當日繁華無覓處
惟餘明月去還來

次韻

蘇世讓

閣道虬松長碧陰
百年斤斧兔相侵
故宮春色無人管
落盡閒花一膝深

寂寞鶯花故國春
滿城車馬踏香塵
悠悠不盡興亡恨
多少風光惱殺人

岌岌山椒百尺臺
淡煙輕雨濕莓苔
多情最是松梢月
夜夜分明過嶺來

右和正使

古木棲鴉鎖夕陰
殿臺蕪沒野耕侵
千年舊迹尋
無處獨立風前
感慨深

國破山河閱幾春
水亭花榭盡成塵
傷心只有臺
前月曾照當時
歌舞人

花滿空園月滿臺
遊人屐齒碎蒼苔
高樓十里朱

簾捲唯見尋巢燕子來

右和副使

遊蔥秀山簡孔觀察

華 察

山氣鬱青蔥
歡遊樂未終
殘花行處落
曲水坐邊通
野色蒼煙外
嵐光夕照中
亭臺含宿雨
帷幄遞薰風
問俗方言別
娛情景物同
使君能好客
不放酒杯空

兩遊葱秀山簡孔觀察志謝且別

薛廷寵

去日殘雲宿水湄歸來風景迥鮮奇
布幢錦簾看能久翠壁青林對不移
憶昨鷹鈴亦獵騎只今魚留尚谿籬
主人愛客偏畱戀無那分携惜路歧

龍泉館次雲岡嘉平韻

華察

候館鬱盤回宛值雲霞口明月在庭除
柔條延戶牖解劒暫息征停驂重回首
啼鳥解迎人飛花來送酒杯中曲水傳
席上羣峰走芳草縈似茵脩蘿鬱如樓
臨川思濯纓流波不盈手沐芳非懷馨
浴蘭豈辭垢盤遊祇自娛觸景多瓊玖
慷慨陳浩歌清風滿雙肘

次韻

蘇世讓

小野隔壠頭賓館傍溪口霽景媚平陸宿霧塞高
牖嶺路度獐項地名山光迎馬首炎塵忽着人菅騰
如中酒譁譁徒卒喧急急駟騎走川原少平坦咫
尺多培塿唾珠每眩眼駭汗還縮手唯須丐賸馥
且復湔塵垢看來喜彈丸報之愧非玖夜窻困曲
肱曉氣清射肘

觀獵

華察

吾觀獵者事平野結虞羅卽有韓盧健寧愁狡兔多
雲外珣弓勁風前雨箭過九秋芳草盡三窟計如何

次韻

蘇世讓

萬騎包原隰千林偃網羅誰辭穿谷險爭獻獲禽
多雉困隨鷹落顰驚帶箭過征途聊一快清興未
闌何

棲鳳亭次雲岡韻

薛廷寵

亭上望鳳山天風散松島含思聽玉簫何以慰所抱
彩鳳或飛來棲此松間好卷阿歌朝陽有懷徒草草
次韻

蘇世讓

孤亭擁蒼藹翼翼凌三島滿山無枳棘虬髯驚合
抱雙鳳忽棲集快覩容儀好高逝邈難攀贈以當

歸草

過棘城

華察

棘城本是棘中成聞說當年此被兵
林畔青松畱鬼哭道邊白骨照人明
大平時世車馬經念爾離亂淚欲橫
何不及時長剪拂俾茲荆棘無由生

次韻

蘇世讓

緣山石城誰所成此地曾聞沒丹兵
天陰雨濕聲啾啾遙看鬼燐終宵明
野壇寂寞無人經草間狐兔猶縱橫
昇平百年少天札耕犁滿地民樂生

黃州道中望海次雲岡韻

華察

綸竿昔掛珊瑚樹我欲持之隔雲霧便從海口問馮夷
洪濤滾滾連天注一呼一吸皆元氣海鯨來往時
相妬附書欲向陽侯投不識陽侯何處住千流萬派
摠同歸對此直欲忘朝暮扶桑日出升丹霞閭苑蓬
萊多雉兔此中可望不可攀射之恐激蛟龍怒聊憑
瑯管付長吟何須滿腹珠璣吐

薛廷寵

海中雲起俱爲樹白日蒼波散晴霧我家本在閩海
東慣聽潮聲日夕注昨朝黃州道上來無那風雨還
欺妬滄海茫茫何處尋幃帷直下不得住歸來正值

天氣清立馬山頭煙水暮自從謁帝洞霄宮曾向廣
寒騎玉兔却歸按劒俯滄溟鯨奔鯢懾不敢怒三譯
近稱海不揚扶桑萬里祥曦吐

次韻

蘇世讓

山窮野豁天低樹茫茫碧海生煙霧望洋忽起河
伯嘆秋水覺似潢潦注驚波不揚纖纈息豐隆敢
與天吳妬曾聞杜子說方丈此間定有羣仙住白
首黃塵未拂衣桑田斥鹵真朝暮蟠桃一熟三千
年擬把長繩繫烏兔天仙笑畱一轉語筆勢遠與
潮爭怒長風颯颯颺颺落日半竿雲吞吐

右和
正使

我欲手折蟠桃樹渺渺鯨波隔雲霧我欲坐看桑
田變混混百川爭奔注年來謬筭坐濩落始信造
物多猜妬但見朝暮日出入如許流年那可住幸
陪天仙騁遐眄不覺孤島斜陽暮醉裏翻思斬巨
鼇興來一揮禿千兔不用燃犀窮物怪天吳驚走
海若怒玄虛巨筆如長杠海天萬里虹霓吐右和副使
簇錦溪有橋可度蘇贊成孔觀察欲延從舟以
豁清眺前出城亟趨使程不果茲歸艤舟以俟
遂從之次雲岡韻

薛廷寵

樓船幔屋晝陰陰渚鷺沙鳧亂水潯車馬過橋忙憶

昨煙波放棹恰宜今魚吹細浪窺青幌鳥帶斜陽度
遠岑短纜緩牽無別意錦溪雖淺酒杯深

次韻

蘇世讓

槐柳成行匝岸陰浴鳬飛鷺滿溪潯佳名一洗於

川舊

溪舊名於草川

綉句爭傳簇錦今細浪含風迎畫棹

斷雲吞日下高岑人間勝事終陳迹還把離愁較
水深

生陽館牡丹盛開

薛廷寵

山城四月牡丹開春色饒畱待客來國秀豈應迷野
蔓天香祇恐墜莓苔芳村日暮停車馬別館風微引

酒杯爲厭五陵蜂蝶閑莫教移近鳳凰臺

次韻

蘇世讓

一枝穠艷爲誰閑前度詩仙今又來暖日政須培
淺土清風先已掃荒苔天葩夜煉丹砂肉國色朝
酣白玉杯歡賞自忘歸路晚恍然身世在瑤臺

騎馬至平壤偶入永明寺戲作東坡體一絕

每

字合七
字意

華察

騎奇扇

蘇

瘦馬奇長大可騎含言小寺不成詩丹心一點橫思

慮毛挿黃麻感及麾

次韻

蘇世讓

立馬寺衛

白馬翻蹄獨立騎無言寺畔欠題詩行行古道半
回首广下青林偃短麾

平壤勝蹟舊凡二十一詠予謂文廟不宜混入
次雲岡韻爲二十詠

華察

德巖

中流砥玉柱江水還自東總謂瞻依地寧知固國功

酒巖

山鳥逐人飛山花行處有醉心更攀桓不爲巖中酒

白銀灘

銀漢本天上人間灘亦銀離離德星聚恍惚到天津

錦繡山

山花向春榮山色麗如繡寄語芻蕘者斧斤毋朝晝

乙密臺

煙霞百尺臺東土小蓬萊仙人何處去千古不歸來

牧丹峰

南有芙蓉峰更見牧丹朶雲間入望來爲爾一停舸

浮碧樓

寒江落空碧應是昆明水高樓俯清流雲影天光裏

練光亭

晴光幾千里危亭落淨川忽聞環珮響疑有凌波仙

井田遺制

我聞千載上仁政九區中東土存遺制依然三代風

朝天石

平壤有奇峰巖巖出林背迎風發清音應是朝天珮

風月樓

畫棟凭虛空瑤池水清淺薰風天上來涼月出東巘

麒麟窟

德教要荒外流祥江水濱
聖人在中國無地不麒麟

綾羅島

危崖掛奇樹鳥啄露盤水雲靄半翠微相將結羅綺
快哉亭

壯志天邊客快心江上亭披襟一長嘯月白與風清
大同江

江水出崑崙雲光盪清碧川流本無心千古自潮汐
挹灝樓

江樓試覽眺江水何瀨瀨一鶴橫霄來乘風下別島

檀君祠

檀君昔分土東方聿胥宇永垂閔國勲百世稱宗祖

箕子墓

春茆刺綠苔短碣倚荒臺九原如可作清風百世來

箕子祠

敬瞻百世師如在吾左右忽憶殷三仁臨風再釃酒

東明王祠

朝鮮本舊封中興自平壤所以東明王千載專烝享

次韻

蘇世讓

捍却滔天勢千年流向東巖巖可比德砥柱未專

功

右德巖

昔日茅君居虛明通小有不見飡液人只餘窪樽

酒

右酒巖

灘白銀亦白所以灘名銀豈識夸毗子茫茫迷路

津

右白銀灘

造物亦多戲峰巒皆衣繡似嫌人不知炫服當春

晝

右錦繡山

仙去臺仍在遺蹤散草萊幾回明月夜華表鶴飛

來

右乙密臺

擢立牧丹峰雲間三兩朶落日倒前川離離搖彩

舸

右牧丹峰

樓角凌空起影浮樓下水我來暫憑欄如在清鏡

裏

右浮碧樓

誰將一匹練展作亭下川緇衣如改敝裁此寄詩

仙

右練光亭

九一有遺制分明在眼中因茲倘起廢可挽淳古

風

右井田遺制

東明昔朝天獨跨麟馬背應有月夜魂歸來弄環

珮

右朝天戶

御寇遊可追元規興不淺沉吟坐忘還目斷雲歸

巘

右風樓

天孫去不返遺跡畱江濱江流自今古何處尋麒

麟

右麒麟窟

小島名綾羅逶迤帶綠水長風捲雨絲落日映霞

綺

右綾羅島

山水開仙府風光萃短亭登臨聊一快心跡儘雙

清

右快哉亭

江水去悠悠晴光浮遠碧何曾管與下沙際空潮

汝

右大汝同江

長江接海門飛閣名挹灝高吟倚朱欄恍入蓬萊

島

右挹灝樓

精靈閔達山千古儼祠宇香火禮不愆永爲東方

祖

右檀君祠

象箸旣不戒誰能諫瑤臺黍離無限恨玉馬又東

來

右箕子墓

再拜古祠下彷彿神在右巍巍萬世功草草三杯

酒

右箕子祠

欲識東明功須看開土壤蕉黃荔子丹恍惚神來

享

右東明王祠

平壤勝蹟用雲岡增入挹瀨而去文廟爲二十
詠盖文廟非一方專勝而尊崇聖道又不敢槩
與山川祠瑩題詠也次雲岡五言韻

薛廷寵

德巖

大江直下鯨波吼巨壁當流障去東一柱乾坤開闢
定龍門不用八年功

酒巖

天上酒星地酒泉酒巖之說其或有當年若遇李謫
仙不用金貂解沽酒

白銀灘

清波白石江心麗斗轉河斜浸素銀却怪桃花貪出
洞翻令紅雨欲迷津

錦繡山

天然翠黛芙蓉姿可奈春葩更錦繡紫霞紅日照波
明水府鮫人躍晴晝

乙密臺

露冷天高月滿臺海中何處望蓬萊相傳浪說仙人
跡不見仙人跨海來

牧丹峰

姚黃魏紫休爭春秀出雲間奇
朶朶妬遊風雨莫頻來有客黃州泛仙舸

浮碧樓

江帶天光俱入樓客在樓中坐
江水虛疑海上蜃氣升更恐身在蓬瀛裏

練光亭

天畔孤亭近碧落銀河瀉練浮
晴川五更月微牛女會恍疑人世隣神仙

井田遺制

朝鮮元是商周國畫野分明井地中
我亦過滕兼適

魯荒區無處問遺風

朝天石

平臨北斗近洞霄稽首玉皇俯鰲背欲上峰頭望五
雲承明恍惚歸星珮

風月樓

清風到樓樓上涼明月浸池池水淺客來坐撫南薰
琴鈎簾入月對東巘

麒麟窟

當年東野柴車載淚落宣尼泗水濱神物正愁人世
見海隅何處又麒麟

綾羅島

鮫人誤落絳霞綃散作綾羅照江水多情文彩雙鴛
鴦日日沙頭弄春綺

快哉亭

何處能逢開口笑大同城內快哉亭長江一帶明晴
練况值風煙四月清

大同江

城南小亭正練光城北危樓更浮碧孤舟來往者何
人江聲日夜奔潮汐

挹灝樓

東人愛水隨處樓浮碧練光更挹灝吾聞仙人好樓
居不知曾否來三島

檀君祠

檀君血食綿東土松木森森蔭祠宇三韓五部何紛
紛此是朝鮮第一祖

箕子墓

一種青山翳綠苔路人指點最高臺云是商家箕子
墓使車迢遞上山來

箕子祠

江城弔古訪箕祠下馬踟躕循堦右松風忽忽作琴

皇華集
聲怨恨分明語池酒

東明王祠

高麗開國東明王澤被東黎保封壤溪毛澗藻走邦
人知爾神靈永綏享

次韻

蘇世讓

崑然砥柱蟠江底長捍衝波日向東微爾民爲魚
鼈食當年神禹不專功

右德
巖

聞名自可口流涎此事今無古或有淳風久與春

臺遠試上高巖將進酒

右酒
巖

要識此灘奇絕處月光翻動白於銀從來人世名

爲累恐有饒夫來問津

右白銀灘

前朝遺事久成空聞說峰巒猶被繡東風却效繁

華跡嫩綠深紅耀春晝

右錦繡山

終古名存乙密臺只今遺迹沒蒿萊風流更被天

仙詠應有笙簫月下來

右乙密臺

千年縹緲牧丹峰遙望雲間紅一朵畱得壺中不

老春晴天日影橫江舸

右牧丹峰

依約天邊千點山古今不盡長江水誰知老子倚

樓時却是分明圖畫裏

右浮碧樓

却憶玄暉曾解道練光朝暮滿前川縠紋不起水

如鏡爲有憑欄天上仙

右練光亭

箕都曾是舊分封地屬周王版籍中城下八區今

井井誰言千里不同風

右井田遺制

朝天人去今何所雲石巉巖跨鶴背月明時送遠

江聲想聽鏘鏘搖玉珮

右朝天石

樓頭明月共誰登老子風流元不淺收拾雙清藏

肺肝芙蓉池上對雲巘

右風月樓

苔封石窟幾經春唯有遺踪淚水濱一自東明朝

帝後千年不復見麒麟

右麒麟窟

誰將草木織成文帝杼雨絲紋感水不是越溪晴

浣紗應有鮫人晝曬綺

右綾羅島

白雲高處閑華構領略湖山集小亭不待楚風生

一快百年心跡坐來清

右快哉亭

久擅名都多勝跡清江一道瑠璃碧舟中行客自

東西不管煙波潮與汝

右大江同江

憑欄若馭風泠泠閑戶長迎氣灝灝未信人間有

此樓仙居豈必皆三島

右挹灝樓

堯時並立分東土千古箕城畱廟宇政自神明民

自淳蒨蕉年年祀鼻祖

右擅君祠

山下石羊空綠苔千章松檜鎖泉臺八條遺教今

猶在長有居人薦酒來

右箕子墓

尚德千秋祠宇存遺民世世祈神右佯狂當日若

爲心宗社顛隳由酗酒

右箕子祠

東方草昧多奇績開國茫然畱古壤三分割據近

千年山下遺祠今尚享

右東明王祠

金觀察菊軒邀遊大同江口占言別

華 察

使君自許淵明儔時時邀客登江樓軒前黃菊照秋水
蕩漾綠波如鴨頭興來復愛放船好揚帆擊槳回
中流亂敲鼉鼓雜鳳管高歌斫劒飛觥籌回首歡娛

未終極夕陽正在西山陬明朝候館促曉發對酒不
覺生離愁

登浮碧樓簡金觀察

薛廷寵

江閣邀賓彩鷁迎高雲錦席暮陰輕水聲中斷浮綾
島樹色遙連到郡城庾亮摠多延夜興仲宣實有賦
歸情笙歌鳥語無聊賴汗漫天涯盖一傾

登快哉亭次雲岡韻

卽看青杏結枝頭荏苒風光過浪遊應有歸心懸
鳳闕暫拚詩興訪雲丘江門煙景浮青舫燕子簾櫳
卷玉鈎初日錦袍乘一快他時夢落舊滄洲

次韻

蘇世讓

簷豁平臨碧樹頭眼前雲物足清遊萬家汲路斜
通郭十里垂楊半隱丘仙子有時吹玉笛美人何
處放簾鉤風飄兩兩潮俱上回首長江不見洲

平壤觀射次雲岡嘉平韻

華察

隔江落日張皮侯材官校射臨山陬自言本是穿楊
手紫錦纏腰白玉鞬弩強弓勁矢命中龍門竹箭支
堅鏃一鼓成行若飛雨再鼓欲剪天吳頭三鼓縱橫
走狐兔衝冠怒髮運良籌仰天大叫矢亂發參連剡
注分江流且憑司馬較勝負奇功嘉爾能先收君不

見武帝上林作邊鄙長驅直抗汧濱水明時不用苦
角力誕修文治朝天子

次韻

蘇世讓

觀德要須明以侯畫布棲皮傍城陬洸洸武士氣
如虹奮臂爭能絡希韝抨弓毛羽落虛弦省括還
教勻四鐏百中終日不出正軍前可梟可汗頭分
曹決勝自閒暇相與揖讓傳觥籌客裏堪供一笑
樂不覺白日從西流一視應知無彼此寸藝片善
期必收終當平虜捍邊鄙不教飲馬長江水屏衛
皇家作干城永絕拔旌天驕子

謁箕子墓作吊詞次雲岡韻

薛廷寵

聊入山兮雲深俯林木兮交陰嗟伊人兮丘壠邈清
風兮焉尋望不見兮鬱四岑碑欲斷兮苔蘚侵琴杳
杳兮松鳴誰來聽兮淚沾襟唯明月兮千古照泉扃
兮知心

次韻

蘇世讓

青嶂合兮白雲深洞壑邃兮松楸陰望佳城兮鬱
鬱思若人兮吾何尋繚短垣兮壓斷岑石獸危兮
苔侵荔丹兮蕉黃莫椒觴兮沾余襟嗚呼敷九疇
而施八條兮深有感乎余之心

宿安定館次董公韻

華察

解轡停官舍向夕人初定中林日影微四野煙光暝
候吏旣出迎津人復來省卽夜爛明星乘昏歷玄景
隱几聽物籟秉燭搖青影竹露晞酒漿松香和湯餅
皎月出東隅承暉還引頸河漢縱以橫回風忽如併
衆芳蔚不分羣木羅於槿靜眺意以深清吟思方韻
琴瑟坐自調衣冠夜還整遠望不可卽高懷亦何騁
暫息王事勞晨雞復喚醒

次韻

蘇世讓

行行路不窮漾漾心無定困來投小館前山已延

暝村市暗戎戎物色渾不省猶疑輞川圖更訝壺
中景風枝動棲禽月林散清影杯浮竹葉酒盤飣
槐芽餅邦人敬迂客引望鵝伸頸自愧薄劣資獲
與仙遊併詩壇掃千軍安用刃與梃祇襲蘭室薰
孰犯詞鋒穎轉頭猶苦吟冠側懶復整但喜附驥
尾不敢憚馳騁挑燈耿不眠塵骨洗然醒

肅寧道中和雲岡大史惜春詞六闕

華 察

山色空濛晴亦雨古道斜陽花氣薰人暮蹢躅香塵
忘住處想應誤入桃源路 爲愛天邊仙掌露一任

浮生不管閒情緒忽聽黃鸝枝上語分明喚却春光去

山寺鳴鐘欺客夢起就琤輿野笛剛三弄歷歷名園春色重欲畱怪底人相送
翹首晴空無盡期流鶯偏傍旌幢唼白馬青韁時自控羅衣潑潑春風動

右蝶戀花二闕

青草池塘楊柳風伯勞西去燕還東長亭小坐酒杯濃
眄飛鴻爲傳消息 玉京中

右憶王孫

山花翠染春衣帶孤鴻渺渺離亭外何處是瀛洲停

驂欲上樓 雞鳴野市曉
混混羊車小回首訊行人
臨風一愴神

右菩薩蠻

春寂寞一片花飛南北
歸夢醒來猶記得堂前開芍
藥 隱隱香風未息却似隨予玉節
一道丹霞聯紫陌恍惚金臺色

右謁金門

遊絲冉冉縈飛絮問訊道春從何去
茫茫綠水瀉長江野渡斜陽鴉噪暮
幾點殘花連夜雨釣艇衝波
維古樹深林簫鼓沸天來劒戟森森
迎客處

右玉樓春

次韻

蘇世讓

錦繡山前逢細雨送客黃鸝似訴風光暮白馬翩翩歸底處
驕嘶緩踏垂楊路籬外幽花含夕露粉蝶飛來翅濕多情緒
姪姪何人門裏語去年崔子今歸去

殘醉厭厭成小夢蝴蝶翩翩飛繞閒花弄覺後無端愁思重
忽忽却把年光送又是暮春天氣朗楊柳吹綿黃鳥交相哢
欲寄深情誰與控薔薇花映風簾動

右蝶戀花二闕

蘭湯浴罷挹清風彩鳳祥麟耀海東天上金花雨

露濃送歸鴻回首燕山瑞靄中

右憶王孫

誰知別後寬圍帶客行盡日雲山外下馬坐芳洲
濃陰蔽翠樓驅車花落曉景勝吟囊小爲報惜

春人韶華易損神

右菩薩蠻

情索莫相送江南江北別後相思書不得爲君含

苦藥鴈斷魚沉消息雨散雲飛旌節歸去玉京

朝紫陌倘記離顏色

右謁金門

來時蒲柳未吹絮歸日山花皆落去眼前人事却

多違黯黯離愁天易暮逐婦鳩鳴初霽雨薊門

迢遞迷煙樹分明他日寄相思水碧山青相送處

右玉樓春

皇華集卷之二十六



華

皇

四